

ओं नमः परमात्मने, श्री महागणपतये नमः,  
श्री गुरुभ्यो नमः  
हरिः ओं ॥

कृष्ण यजुर्वेदीय तैत्तिरीय संहिता  
पद पाठः (वाक्य सहित)

प्रथमकाण्डे तृतीयः प्रश्नः

---

## **Version Notes:**

**This is now the current Version 2.0 dated June 30, 2024.**

1. This replaces the earlier version 1.2 dated Oct 31, 2023.
2. This version has been updated with the errors found and reported till June 15, 2024.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id [vedavms@gmail.com](mailto:vedavms@gmail.com)

### **Earlier Versions**

1st	Version Number	0.0	dated 31st Mar 2019
2nd	Version Number	0.1	dated 31st Mar 2020
3rd	Version Number	0.2	dated 30th June 2020
4th	Version Number	0.3	dated 31st Aug 2020
5th	Version Number	1.0	dated 30th June 2021
6th	Version Number	1.0	dated 31st Oct 2021
7th	Version Number	1.1	dated 31st Aug 2022
8th	Version Number	1.2	dated 31st Oct 2023

---

## Table of Contents

1 कृष्ण यजुर्वेदीय तैत्तिरीय संहिता पद पाठे प्रथमं काण्डं .....	5
1.3 प्रथमकाण्डे तृतीयः प्रश्नः – अग्निष्टोमे पशुः.....	5



ओं नमः परमात्मने, श्री महागणपतये नमः,

श्री गुरुभ्यो नमः ॥ हरिः ओं

## 1 कृष्ण यजुर्वेदीय तैत्तिरीय संहिता पद पाठे

### प्रथमं काण्डं

#### 1.3 प्रथमकाण्डे तृतीयः प्रश्नः – अग्निष्टोमे पशुः

##### TS 1.3.1.1

दे॒वस्य॑ त्वा स॒वितुः॑ प्र॒सवे॑ ऽश्विनो॑र्बा॒हुभ्यां॑ पू॒ष्णो ह॒स्ताभ्या॑मा  
ददे॑ ऽभ्रि॒रसि॑ ना॒रि॒रसि॑ परि॒लिखि॑त॒ रक्षः॑ परि॒लिखि॑ता अ॒रातय॑  
इ॒दम॒हं रक्ष॑सो ग्री॒वा अपि॑ कृ॒न्तामि॑ यो॒ ऽस्मान् द्वेष्टि॑ यं च॑ व॒यं  
द्विष्म॑ इ॒दम॒स्य ग्री॒वा अपि॑ कृ॒न्तामि॑ दि॒वे त्वा॑ ऽन्तरि॑क्षाय॒ त्वा पृ॑थि॒व्यै  
त्वा शु॒न्धतां॑ लो॒कः पि॒तृष॑दनो॒ यवो॑ ऽसि॒ यवया॑स्मद्द्वेष्टो – [ ] 1

##### 1.3.1.1 - Padam

दे॒वस्य॑ । त्वा । स॒वितुः॑ । प्र॒सव॑ इति॒ प्र – स॒वे । अ॒श्विनोः॑ ।  
बा॒हुभ्या॑मिति॒ बा॒हु – भ्या॑म् । पू॒ष्णः । ह॒स्ताभ्या॑म् ।  
एति॑ । ददे॑ । अ॒भ्रिः । अ॒सि । ना॒रिः । अ॒सि ।  
परि॒लिखि॑तमिति॒ परि – लि॒खि॒तम् । रक्षः॑ । परि॒लिखि॑ता इति॒  
परि – लि॒खि॒ताः । अ॒रातयः॑ । इ॒दम् । अ॒हम् । रक्ष॑सः । ग्री॒वाः ।

अपीति । कृ॒न्ता॒मि॒ । यः । अ॒स्मान् । द्वेष्टि॑ । यम् । च॒ । व॒यम् । द्विष्मः॑ ।  
 इ॒दम् । अ॒स्य॒ । ग्री॒वाः । अपीति॑ । कृ॒न्ता॒मि॒ । दि॒वे । त्वा॒ ।  
 अ॒न्तरि॑क्षाय । त्वा॒ । पृ॒थि॒व्यै । त्वा॒ । शु॒न्धता॑म् । लो॒कः । पि॒तृष॑दन॒ इति॑  
 पि॒तृ – स॑दनः । यवः॑ । अ॒सि॒ । य॒वय॑ । अ॒स्मत् । द्वेषः॑ । 1 (50)

### TS 1.3.1.2

य॒वया॑रातीः पि॒तृणां॑ स॑दनम॒स्युद्-दि॒वः॑ स्त॒भाना॑ ऽन्तरि॑क्षं पृ॒ण  
 पृ॒थि॒वीं दृ॒ह द्यु॑ता॒नस्त्वा॑ मा॒रुतो॑ मि॒नोतु॑ मि॒त्राव॑रुणयोर् ध्रु॒वेण॑ धर्म॑णा  
 ब्र॒ह्मव॑निं त्वा क्ष॒त्रव॑निं सु॒प्रजा॑वनिं रा॒यस्पो॑षवनिं पर्यू॑हामि ब्र॒ह्म  
 दृ॒ह क्ष॒त्रं दृ॒ह प्र॒जां दृ॒ह रा॒यस्पो॑षं दृ॒ह घृ॑तेन द्या॒वापृ॑थि॒वी  
 आ पृ॑णे॒थामि॑न्द्रस्य स॒दो ऽसि॑ विश्व॒जन॑स्य छा॒या परि॑ त्वा गि॒र्वणो॑  
 गि॒र इ॒मा ( ) भ॑वन्तु वि॒श्वतो॑ वृ॒द्धायु॑मनु वृ॒द्धयो॑ जु॒ष्टा भ॑वन्तु जु॒ष्टय॑  
 इ॒न्द्रस्य॑ स्यूर॒सीन्द्र॑स्य ध्रु॒वम॑स्यै॒न्द्रम॑सीन्द्राय त्वा ॥ 2

### 1.3.1.2 - Padam

य॒वय॑ । अ॒रातीः॑ । पि॒तृणा॑म् । स॑दनम् । अ॒सि॒ । उ॒दि॒ति॑ । दि॒वम् ।  
 स्त॒भान॑ । ए॒ति॑ । अ॒न्तरि॑क्षम् । पृ॒ण । पृ॒थि॒वीम् । दृ॒ह । द्यु॑ता॒नः ।  
 त्वा॒ । मा॒रुतः॑ । मि॒नोतु॑ । मि॒त्राव॑रुणयो॒रिति॑ मि॒त्रा – व॑रुणयोः ।  
 ध्रु॒वेण॑ । धर्म॑णा । ब्र॒ह्मव॑निमि॒ति ब्र॒ह्म – व॑निम् । त्वा॒ ।

क्ष॒त्र॒व॒नि॒मि॒ति॑ क्ष॒त्र – व॒नि॒म् । सु॒प्र॒जा॒व॒नि॒मि॒ति॑ सु॒प्र॒जा – व॒नि॒म् ।  
 रा॒य॒स्पो॒ष॒व॒नि॒मि॒ति॑ रा॒य॒स्पो॒ष – व॒नि॒म् । प॒री॒ति॑ । ऊ॒हा॒मि॒ । ब्र॒ह्म॑ ।  
 दृ॒॒ह॒ । क्ष॒त्र॒म् । दृ॒॒ह॒ । प्र॒जा॒मि॒ति॑ प्र – जा॒म् । दृ॒॒ह॒ । रा॒यः॑ ।  
 पो॒ष॒म् । दृ॒॒ह॒ । घृ॒ते॒न॑ । द्या॒वा पृ॒थि॒वी इति॑ द्या॒वा – पृ॒थि॒वी । ए॒ति॑ ।  
 पृ॒णे॒था॒म् । इ॒न्द्र॒स्य॑ । स॒दः॑ । अ॒सि॒ । वि॒श्व॒ज॒न॒स्ये॒ति॑ वि॒श्व – ज॒न॒स्य॑ ।  
 छा॒या । प॒री॒ति॑ । त्वा॒ । गि॒र्व॒णः॑ । गि॒रः॑ । इ॒माः ( ) । भ॒व॒न्तु॑ । वि॒श्व॒तः॑ ।  
 वृ॒द्धा॒यु॒मि॒ति॑ वृ॒द्ध – आ॒यु॒म् । अ॒न्वि॒ति॑ । वृ॒द्ध॒यः॑ । जु॒ष्टाः॑ । भ॒व॒न्तु॑ ।  
 जु॒ष्ट॒यः॑ । इ॒न्द्र॒स्य॑ । स्यूः॑ । अ॒सि॒ । इ॒न्द्र॒स्य॑ । ध्रु॒व॒म् ।  
 अ॒सि॒ । ऐ॒न्द्र॒म् । अ॒सि॒ । इ॒न्द्रा॒य॑ । त्वा॒ ॥ 2 (68)

( द्वेष – इ॒मा – अ॒ष्टा॒द॒श च ) (A1)

### TS 1.3.2.1

र॒क्षो॒ह॒णो॑ व॒ल॒ग॒ह॒नो॑ वै॒ष्ण॒वा॒न् ख॒ना॒मी॒द॒म॒हं॑ तं व॒ल॒ग॒मु॒द्-व॒पा॒मि॒  
 यं नः॑ स॒मा॒नो॑ य॒म॒स॒मा॒नो॑ नि॒च॒ख॒ाने॒द॒मे॒न॒म॒ध॒रं॑ क॒रो॒मि॒ यो नः॑ स॒मा॒नो॑  
 यो ऽस॒मा॒नो॑ ऽरा॒ती॒य॒ति॑ गा॒य॒त्रे॒ण छ॒न्द॒सा ऽव॒बा॒ढो॑ व॒ल॒गः॑ कि॒म॒त्र भ॒द्रं॑  
 तन्नो॑ स॒ह वि॒रा॒ड॒सि॑ स॒प॒त्न॒हा स॒म्रा॒ड॒सि॑ भ्रा॒तृ॒व्य॒हा  
 स्व॒रा॒ड॒स्य॒भि॒मा॒ति॒हा॑ वि॒श्वा॒रा॒ड॒सि॑ वि॒श्वा॒सां॑ ना॒ष्ट्रा॒णां॑ ह॒न्ता – [ ] 3

**1.3.2.1 - Padam**

र॒क्षो॒ह॒ण॒ इति॑ रक्षः – ह॒नः॑ । व॒ल॒ग॒ह॒न॒ इति॑ वलग – ह॒नः॑ ।  
 वै॒ष्ण॒वा॒न् । ख॒ना॒मि॒ । इ॒द॒म् । अ॒ह॒म् । त॒म् । व॒ल॒ग॒मि॒ति॑ वल-गम् ।  
 उ॒दि॒ति॑ । व॒पा॒मि॒ । य॒म् । नः॑ । स॒मा॒नः॑ । य॒म् । अ॒स॒मा॒नः॑ ।  
 नि॒च॒खा॒ने॒ति॑ नि – च॒खा॒न॒ । इ॒द॒म् । ए॒न॒म् । अ॒ध॒र॒म् । क॒रो॒मि॒ । यः॑ ।  
 नः॑ । स॒मा॒नः॑ । यः॑ । अ॒स॒मा॒नः॑ । अ॒रा॒ती॒य॒ति॑ । गा॒य॒त्रे॒ण॒ । छ॒न्द॒सा॒ ।  
 अ॒व॒बा॒ढ॒ इत्य॑व – बा॒ढः॑ । व॒ल॒ग॒ इति॑ वल – गः॑ । कि॒म् । अ॒त्र॒ ।  
 भ॒द्र॒म् । त॒त् । नौ॑ । स॒ह॒ । वि॒रा॒डि॒ति॑ वि – राट् । अ॒सि॒ ।  
 स॒प॒त्न॒हे॒ति॑ सपत्न – हा । स॒म्रा॒डि॒ति॑ सम् – राट् । अ॒सि॒ ।  
 भ्रा॒तृ॒व्य॒हे॒ति॑ भ्रातृव्य – हा । स्वर॒ाडि॒ति॑ स्व – राट् । अ॒सि॒ ।  
 अ॒भि॒मा॒ति॒हे॒त्य॒भि॒मा॒ति॑ – हा । वि॒श्वा॒रा॒डि॒ति॑ विश्व – राट् । अ॒सि॒ ।  
 वि॒श्वा॒सा॒म् । ना॒ष्ट्रा॒णा॒म् । ह॒न्ता॒ । 3 (50)

**TS 1.3.2.2**

र॒क्षो॒ह॒णो॑ व॒ल॒ग॒ह॒नः॑ प्रो॒क्षामि॑ वै॒ष्ण॒वा॒न् र॒क्षो॒ह॒णो॑ व॒ल॒ग॒ह॒नो॑ ऽव  
 न॒यामि॑ वै॒ष्ण॒वा॒न् यवो॑ ऽसि॒ य॒व॒या॒स्मद् द्वे॒षो॑ य॒व॒या॒रा॒ती॑ र॒क्षो॒ह॒णो॑  
 व॒ल॒ग॒ह॒नो॑ ऽव स्तृ॒णामि॑ वै॒ष्ण॒वा॒न् र॒क्षो॒ह॒णो॑ व॒ल॒ग॒ह॒नो॑ ऽभि॒ जु॒हो॒मि॑  
 वै॒ष्ण॒वा॒न् र॒क्षो॒ह॒णो॑ व॒ल॒ग॒ह॒नावु॑प द॒धामि॑ वै॒ष्ण॒वी॑ र॒क्षो॒ह॒णो॑ व॒ल॒ग॒ह॒नो॑



पर्यू॒हामि॑ वै॒ष्ण॒वी रक्षो॑ह॒णौ व॒लग॒हनौ॑ परि॒ स्तृ॒णामि॑ वै॒ष्ण॒वी रक्षो॑ह॒णौ  
व॒लग॒हनौ॑ वै॒ष्ण॒वी बृ॒हन्न॑सि॒ बृ॒हद्ग्रा॑वा बृ॒हती॑मिन्द्रा॒य ( )

वाचं॑ ँ॒वद॑ ॥ 4

### 1.3.2.2 - Padam

रक्षो॑ह॒ण इति॑ रक्षः – ह॒नः । व॒लग॒हन॑ इति॑ व॒लग – ह॒नः ।  
प्रेति॑ । उ॒क्षामि॑ । वै॒ष्ण॒वान् । रक्षो॑ह॒ण इति॑ रक्षः – ह॒नः । व॒लग॒हन॑  
इति॑ व॒लग – ह॒नः । अ॒वेति॑ । न॒यामि॑ । वै॒ष्ण॒वान् । य॒वः । अ॒सि ।  
य॒वय॑ । अ॒स्मत् । द्वे॒षः । य॒वय॑ । अ॒रातीः । रक्षो॑ह॒ण इति॑  
रक्षः – ह॒नः । व॒लग॒हन॑ इति॑ व॒लग – ह॒नः । अ॒वेति॑ । स्तृ॒णामि॑ ।  
वै॒ष्ण॒वान् । रक्षो॑ह॒ण इति॑ रक्षः – ह॒नः । व॒लग॒हन॑ इति॑ व॒लग – ह॒नः ।  
अ॒भीति॑ । जु॒होमि॑ । वै॒ष्ण॒वान् । रक्षो॑ह॒णाविति॑ रक्षः – ह॒नौ ।  
व॒लग॒ह॒णाविति॑ व॒लग – ह॒नौ । उ॒पेति॑ । द॒धामि॑ । वै॒ष्ण॒वी इति॑ ।  
रक्षो॑ह॒णाविति॑ रक्षः – ह॒नौ । व॒लग॒ह॒णाविति॑ व॒लग – ह॒नौ । प॒रीति॑ ।  
ऊ॒हामि॑ । वै॒ष्ण॒वी इति॑ । रक्षो॑ह॒णाविति॑ रक्षः – ह॒नौ ।  
व॒लग॒ह॒णाविति॑ व॒लग – ह॒नौ । प॒रीति॑ । स्तृ॒णामि॑ । वै॒ष्ण॒वी इति॑ ।  
रक्षो॑ह॒णाविति॑ रक्षः – ह॒नौ । व॒लग॒ह॒णाविति॑ व॒लग – ह॒नौ ।  
वै॒ष्ण॒वी इति॑ । बृ॒हन् । अ॒सि । बृ॒हद्ग्रा॑वेति॑ बृ॒हत् – ग्रा॒वा ।

बृ॒ह॒ती॒म् । इ॒न्द्रा॒य ( ) । वा॒च॒म् । व॒द् ॥ 4 (52)

( ह॒न्ते॑-न्द्रा॒य द्वे च॑ ) (A2)

**TS 1.3.3.1**

वि॒भूर॑सि॒ प्र॒वा॒ह॒णो॒ वहि॑रसि॒ ह॒व्य॒वा॒ह॒नः॑ श्वा॒त्रो॒ ऽसि॑ प्र॒चे॒तास्तु॑थो॒  
ॽसि॑ वि॒श्व॒वे॒दा उ॒शि॒ग॒सि क॒वि॒रङ्घा॑रि॒रसि॑ बं॒भारि॑व॒स्युर॑सि  
दु॒व॒स्वाञ्छु॑न्ध्यूर॒सि मा॒र्जा॒ली॒यः॑ स॒म्रा॒ड॒सि कृ॒शानुः॑ परि॒षद्यो॑ ऽसि  
प॒व॒मा॒नः प्र॒तक्वा॑ ऽसि न॒भ॒स्वा॒नसं॑मृ॒ष्टो ऽसि॑ ह॒व्य॒सू॒द ऋ॒त॒धा॒मा ऽसि॑  
सु॒व॒ज्यो॑तिर्ब्र॒ह्म॒ज्यो॑ति॒रसि॑ सु॒व॒र्ध॒धा॒मा ऽजो॑ ऽस्ये॒क॒पा॒द॒हि॒रसि॑  
बु॒द्धि॒न॒यो रौ॒द्रे॒णानी॑के॒न ( ) पा॒हि मा॑ ऽग्ने पि॒पृ॒हि मा॑ मा  
मा हि॒प्सीः॑ ॥ 5

**1.3.3.1 - Padam**

वि॒भूरि॑ति वि – भूः । अ॒सि॒ । प्र॒वा॒ह॒ण इति॑ प्र – वा॒ह॒नः । वहि॑ः ।  
अ॒सि॒ । ह॒व्य॒वा॒ह॒न इति॑ ह॒व्य – वा॒ह॒नः । श्वा॒त्रः । अ॒सि॒ । प्र॒चे॒ता  
इति॑ प्र – चे॒ताः । तु॒थः । अ॒सि॒ । वि॒श्व॒वे॒दा इति॑ वि॒श्व – वे॒दाः ।  
उ॒शि॒क् । अ॒सि॒ । क॒विः । अ॒ङ्घा॑रिः । अ॒सि॒ । बं॒भारिः । अ॒व॒स्युः ।  
अ॒सि॒ । दु॒व॒स्वा॒न् । शु॒न्ध्यूः । अ॒सि॒ । मा॒र्जा॒ली॒यः । स॒म्रा॒डि॒ति  
सं – राट् । अ॒सि॒ । कृ॒शानु॑रिति कृ॒श – अ॒नुः ।

परि॒षद्य॒ इति॑ परि – सद्यः॑ । अ॒सि॒ । पव॑मानः ।

प्र॒तक्वे॑ति॒ प्र – तक्वा॑ । अ॒सि॒ ।

नभ॑स्वान् । अ॒सं॒मृष्ट॑ इत्य॒सं – मृष्टः॑ । अ॒सि॒ । ह॒व्य॒सूद॑ इति॑

ह॒व्य – सूदः॑ । ऋ॒त॒धा॒मेत्य॑त – धा॒मा । अ॒सि॒ । सु॒व॒ज्यो॒तिरि॑ति॒

सु॒वः – ज्यो॒तिः । ब्र॒ह्म॒ज्यो॒तिरि॑ति॒ ब्र॒ह्म – ज्यो॒तिः । अ॒सि॒ ।

सु॒व॒र्धा॒मेति॑ सु॒वः – धा॒मा । अ॒जः । अ॒सि॒ । ए॒क॒पा॒दि॒त्ये॒क – पा॒त् ।

अ॒हिः । अ॒सि॒ । बु॒ध्नियः॑ । रौ॒द्रेण॑ । अ॒नी॒केन॑ ( ) । पा॒हि॒ । मा॒ ।

अ॒ग्ने॒ । पि॒पृ॒हि॒ । मा॒ । मा॒ । मा॒ । हि॒॒सीः॑ ॥ 5 (58)

(अनीकेना-ष्टौ च) (A3)

**TS 1.3.4.1**

त्व॒ सोम॑ त॒नू॒कृ॒द्भ्यो॒ द्वेषो॑भ्यो॒ ऽन्य॑कृ॒तेभ्य॑ उ॒रु य॑न्ता ऽसि॒ वरू॑थ॒

स्वा॒हा जु॑षा॒णो अ॒प्तु॒राज्य॑स्य वे॒तु स्वा॒हा ऽयं॑ नो॒ अ॒ग्निर्व॑रि॒वः

कृ॒णो॒त्वयं॑ मृ॒धः पु॒र ए॒तु प्र॑भि॒न्दन् ।

अ॒य॒ श॒त्रू॒ज्ज॑यतु॒ जर्॒ह॒षा॒णो ऽयं॑ वा॒जं ज॑यतु॒ वाज॑सातौ ॥

उ॒रु वि॑ष्णो॒ वि क्र॑म॒स्वो॒रु क्ष॑याय नः कृ॒धि ॥

घृ॒तं घृ॑तयो॒ने पि॒ब प्र॑प्र॒ य॒ज्ञ॒पतिं॑ ति॒र ॥

सोमो॑ जिगाति गा॒तु॒विद् – [ ] 6

**1.3.4.1 - Padam**

त्वम् । सोम । तनू॑कृद्भ्य॒ इति॑ तनू॑कृत् – भ्यः । द्वेषो॑भ्य॒ इति॑  
 द्वेषः॑ – भ्यः । अन्य॑कृतेभ्य॒ इत्यन्य॑ – कृते॑भ्यः । उरु॑ । यन्ता ।  
 असि॑ । वरू॒थम् । स्वाहा॑ । जुषा॑णः । अप्तुः॑ । आज्य॑स्य । वेतु॑ ।  
 स्वाहा॑ । अयं॑ । नः । अग्निः॑ । वरि॑वः । कृ॒णोतु॑ । अयम् । मृ॒धः ।  
 पुरः॑ । एतु॑ । प्र॒भिन्द॑न्निति॒ प्र – भि॒न्दन् ॥ अयम् । शत्रून् । ज॒यतु॑ ।  
 जर्॒हृषा॑णः । अयम् । वाजम् । ज॒यतु॑ । वाज॑साता॒विति॑ वाज॑-सा॒तौ ॥  
 उरु॑ । वि॒ष्णो इति॑ । वीति॑ । क्र॒मस्व॑ । उरु॑ । क्षया॑य । नः । कृ॒धि ॥  
 घृ॒तम् । घृ॒तयो॑न इति॑ घृ॒त – यो॑ने । पिब॑ । प्र॒प्रेति॑ प्र – प्र ।  
 य॒ज्ञप॑तिमिति॒ य॒ज्ञ – प॑तिम् । तिर॑ ॥ सोमः॑ । जिगा॑ति ।  
 गा॒तुवि॑दिति॒ गा॒तु – वि॑त् । 6 (50)

**TS 1.3.4.2**

दे॒वाना॑मेति॒ निष्कृ॑तमृ॒तस्य॑ यो॒निमा॑सद॒मदि॑त्याः स॒दो ऽस्य॑दि॒त्याः स॒द  
 आ॑ सी॒दैष॑ वो॒ देव॑ स॒वितः॑ सोम॒स्तर्क्ष॑द्ध्वं मा वो॒ दभ॑दे॒तत्त्वर्क्ष॑  
 सोम॑ दे॒वो दे॒वानु॑पागा इ॒दम॑हं म॒नुष्यो॑ म॒नुष्या॑न्थ् स॒ह प्र॑जया स॒ह  
 रा॒यस्पो॑षेण॒ नमो॑ दे॒वेभ्यः॑ स्व॒धा पि॒तृभ्य॑ इ॒दम॑हं निर्व॑रुणस्य॒ पाशा॑थ्  
 सु॒वर॑भि-[ ] 7

**1.3.4.2 - Padam**

दे॒वाना॑म् । ए॒ति॒ । नि॒ष्कृ॒तमि॑ति॒ निः – कृ॒तम् । ऋ॒तस्य॑ । यो॒निम् ।  
 आ॒सद॑मि॒त्या– सद॑म् । अ॒दि॒त्याः । स॒दः । अ॒सि॒ । अ॒दि॒त्याः । स॒दः ।  
 ए॒ति॒ । सी॒द । ए॒षः । वः । दे॒व । स॒वि॒तः । सो॒मः । तम् । र॒क्ष॒ध्वम् ।  
 मा । वः । द॒भ॒त् । ए॒तत् । त्वम् । सो॒म । दे॒वः । दे॒वान् । उ॒पेति॑ ।  
 अ॒गाः । इ॒दम् । अ॒हम् । म॒नु॒ष्यः । म॒नु॒ष्यान् । स॒ह । प्र॒जये॑ति॒  
 प्र – जया॑ । स॒ह । रा॒यः । पो॒षेण॑ । न॒मः । दे॒वेभ्यः॑ ।  
 स्व॒धेति॑ स्व – धा । पि॒तृभ्य॑ इति॒ पि॒तृ – भ्यः । इ॒दम् । अ॒हम् ।  
 नि॒रिति॑ । व॒रु॒णस्य॑ । पा॒शात् । सु॒वः । अ॒भि । 7 (50)

**TS 1.3.4.3**

वि॒ ख्ये॑षं वै॒श्वान॑रं॒ ज्योति॑र॒ग्ने॒ व्रत॑प॒ते त्वं॑ व्र॒तानां॑ व्र॒तप॑ति॒रसि॒या म॑म  
 त॒नूस्त्वय्य॑भू॒दिय॑ सा म॒यि या तव॑ त॒नूर् मय्य॑भू॒देषा॑ सा  
 त्वयि॑यथा॒यथं॑ नौ व्रत॑प॒ते व्र॒तिनो॑र् व्र॒तानि॑ ॥ 8

**1.3.4.3 - Padam**

वी॒ति॒ । ख्ये॑षम् । वै॒श्वान॑रम् । ज्यो॒तिः । अ॒ग्ने॒ । व्र॒तप॑त॒ इति॑  
 व्रत – प॒ते । त्वम् । व्र॒ताना॑म् । व्र॒तप॑ति॒रिति॑ व्रत – प॒तिः । अ॒सि॒ ।  
 या । म॑म । त॒नूः । त्वयि॑ । अ॒भूत् । इ॒यम् । सा । म॒यि । या । तव॑ ।  
 त॒नूः । म॒यि । अ॒भूत् । ए॒षा । सा । त्वयि॑ । य॒था॒यथ॑मि॒ति॒ यथा॑–य॒थम् ।

नौ । व्रतपत इति व्रत – पते । व्रतिनोः । व्रतानि ॥ 8 (31)

(गातुविद-भ्ये-कत्रिंशच्च) (A4)

**TS 1.3.5.1**

अत्यन्या॑नगां॑ नान्या॑नुपा॑ गाम॑र्वाक् त्वा॑ परै॑रविदं॑ परो॑ ऽवरै॑स्तं॑ त्वा॑ जुषे॑  
वैष्ण॑वं दे॒वय॑ज्यायै॑ दे॒वस्त्वा॑ सवि॒ता म॑ध्वा॒ ऽन॑क्त्वोष॑धे त्रा॒यस्वै॑न॒  
स्व॒धिते॑ मै॒नं हि॑ंसी॒र् दि॒वम॑ग्रेण॒ मा ले॑खी॒रन्त॑रि॒क्षं म॑द्ध्ये॒न मा  
हि॑ंसीः पृ॒थि॒व्या सं भ॑व वन॒स्पते॑ शत॒वल् शो॒ वि रो॑ह  
सह॒स्रव॑ल् शो॒ वि वयं॑ रु॒हेम॑ यं ( ) त्वा॒य स्व॒धिति॑स्तेति॒जानः॑  
प्रणि॑नाय॒ मह॑ते सौ॒भगा॑याच्छि॒न्नो रा॑यः सु॒वीरः॑ ॥ 9

**1.3.5.1 - Padam**

अती॑ति । अ॒न्यान् । अ॒गा॒म् । न । अ॒न्यान् । उपे॑ति । अ॒गा॒म् ।  
अ॒र्वाक् । त्वा॑ । परैः॑ । अ॒वि॒दम् । परः॑ । अ॒वरैः॑ । तम् । त्वा॑ । जुषे॑ ।  
वैष्ण॑वम् । दे॒वय॑ज्याया॒ इति॑ दे॒व – य॑ज्यायै॑ । दे॒वः । त्वा॑ । स॒वि॒ता ।  
म॑ध्वा । अ॒न॒क्तु॑ । ओष॑धे । त्रा॒यस्व॑ । ए॒नम् । स्व॒धित॑ इति॒ स्व-धिते॑ ।  
मा । ए॒नम् । हि॑ंसीः । दि॒वम् । अ॒ग्रेण॑ । मा । ले॑खीः । अ॒न्त॒रि॒क्षम् ।  
म॑ध्ये॒न । मा । हि॑ंसीः । पृ॒थि॒व्या । स॒मि॒ति । भ॑व । वन॒स्पते॑ ।

श॒त॒वल्॒श॒ इति॑ श॒त – वल्॒शः॑ । वी॒ति । रो॒ह । स॒ह॒स्र॒वल्॒शा॒ इति॑  
 स॒ह॒स्र – वल्॒शः॑ । वी॒ति । व॒यम् । रु॒हे॒म । यम् ( ) । त्वा ।  
 अ॒यम् । स्व॒धि॒ति॒रिति॑ स्व – धि॒तिः॑ । ते॒ति॒जानः॑ ।  
 प्र॒णि॒ना॒येति॑ प्र – नि॒नाय॑ । म॒ह॒ते । सौ॒भ॒गाय॑ । अ॒च्छि॒न्नः । रा॒यः ।  
 सु॒वी॒र इति॑ सु – वी॒रः ॥ 9 (60) (यं–दश॑ च) (A5)

### TS 1.3.6.1

पृ॒थि॒व्यै त्वा॒ ऽन्त॑रि॒क्षाय॑ त्वा दि॒वे त्वा॒ शु॒न्ध॑तां लो॒कः पि॒तृ॒षद॑नो  
 यवो॑ ऽसि॒ यव॑या॒स्मद्द्वेषो॑ यव॑या॒रातीः॑ पि॒तृ॒णां स॑दन॒मसि॑  
 स्वा॒वेशो॑ ऽस्य॒ग्रेगा॑ ने॒तृणां॑ व॒नस्प॑तिरधि॒ त्वा स्था॑स्यति॒ तस्य॑  
 वि॒त्ताद्दे॒वस्त्वा॑ सवि॒ता म॑द॒ध्वा ऽन॑क्तु सु॒पिप्प॒लाभ्य॑स्त्वौष॒धीभ्य॑  
 उद्–दि॒व स्त॑भा॒ना ऽन्त॑रि॒क्षं पृ॒ण पृ॒थि॒वीमु॑परेण दृ॒ह ते ते  
 धा॒मान्यु॑र॒मसी॑ – [ ] 10

### 1.3.6.1 - Padam

पृ॒थि॒व्यै । त्वा । अ॒न्त॑रि॒क्षाय॑ । त्वा । दि॒वे । त्वा । शु॒न्ध॑ताम् ।  
 लो॒कः । पि॒तृ॒षद॑न इति॑ पि॒तृ – स॑दनः । यवः । अ॒सि । यव॑य ।  
 अ॒स्मत् । द्वेषः । यव॑य । अ॒रातीः॑ । पि॒तृ॒णाम् । स॑दनम् । अ॒सि ।  
 स्वा॒वेश॑ इति॑ सु – आ॒वेशः॑ । अ॒सि । अ॒ग्रेगा॑ इत्य॒ग्रे – गाः ।

ने॒तृ॒णाम् । व॒न॒स्प॒तिः । अधी॑ति । त्वा । स्था॒स्य॒ति । तस्य॑ । वि॒त्तात् ।  
 दे॒वः । त्वा । स॒वि॒ता । म॒ध्वा । अ॒न॒क्तु॒ ।  
 सु॒पि॒प्प॒ला॒भ्य इति॑ सु – पि॒प्प॒ला॒भ्यः ।  
 त्वा । ओष॑धी॒भ्य इत्योष॑धि – भ्यः॑ । उ॒दि॒ति । दि॒वम् । स्त॒भान् ।  
 ए॒ति । अ॒न्त॒रि॒क्षम् । पृ॒ण । पृ॒थि॒वीम् । उ॒प॒रेण॑ । दृ॒ह । ते । ते ।  
 धा॒मानि॑ । उ॒श्म॒सि । 10 (50)

**TS 1.3.6.2**

ग॒म॒द्ध्ये॒ गा॒वो॒ यत्र॑ भू॒रि॒शृ॒ङ्गा अ॒यासः॑ ॥  
 अ॒त्रा॒ह तदु॑रु॒गाय॑स्य वि॒ष्णोः॑ प॒र॒मं प॒द॒मव॑ भा॒ति भू॒रैः॑ ॥  
 वि॒ष्णोः॑ क॒र्मा॒णि प॒श्य॒त यतो॑ व्र॒तानि॑ प॒स्प॒शे ॥  
 इ॒न्द्र॒स्य यु॒ज्यः॑ स॒खा ॥  
 तद्-वि॒ष्णोः॑ प॒र॒मं प॒द॒ सदा॑ प॒श्य॒न्ति सू॒रयः॑ ।  
 दि॒वीव॑ चक्षु॒रा॒त॒तं ॥  
 ब्र॒ह्म॒व॒निं त्वा क्ष॒त्र॒व॒निं सु॒प्र॒जा॒व॒निं रा॒य॒स्पोष॑व॒निं पर्यू॑हामि  
 ब्र॒ह्म दृ॒ह क्ष॒त्रं दृ॒ह प्र॒जां दृ॒ह रा॒य॒स्पोषं॑ ( ) दृ॒ह परि॑वीर॒सि  
 परि॑ त्वा दै॒वीर्वि॒शो व्य॑य॒न्तां प॒रीम॑ रा॒य॒स्पोषो॑ य॒ज॒मा॒नं म॒नु॒ष्या  
 अ॒न्त॒रि॒क्ष॒स्य त्वा सा॒ना॒व॒व गू॒हामि॑ ॥ 11



**1.3.6.2 - Padam**

ग॒म॒ध्वे॑ । गा॒वः॑ । य॒त्र । भू॒रिशृ॑ङ्गा इति॒ भू॒रि॑ – शृ॒ङ्गाः॑ । अ॒यासः॑ ॥  
 अ॒त्र । अ॒ह॒ । तत् । उ॒रुगा॑यस्येत्यु॒रु – गा॑यस्य । वि॒ष्णोः॑ । प॒र॒म॒म् ।  
 प॒द॒म् । अ॒वेति॑ । भा॒ति॒ । भू॒रेः॑ ॥ वि॒ष्णोः॑ । क॒र्मा॑णि । प॒श्य॒त॒ । य॒तः॑ ।  
 व्र॒ता॒नि॒ । प॒स्प॒शे॑ ॥ इ॒न्द्र॒स्य॑ । यु॒ज्यः॑ । स॒खा ॥ तत् । वि॒ष्णोः॑ ।  
 प॒र॒म॒म् । प॒द॒म् । स॒दा । प॒श्य॒न्ति॑ । सू॒रयः॑ ॥ दि॒वि॒ । इ॒व॒ । चक्षुः॑ ।  
 आ॒त॒त॒मि॒त्या – त॒त॒म् ॥ ब्र॒ह्म॒व॒नि॒मि॒ति॑ ब्र॒ह्म – व॒नि॒म् । त्वा॒ ।  
 क्ष॒त्र॒व॒नि॒मि॒ति॑ क्ष॒त्र – व॒नि॒म् । सु॒प्र॒जा॒व॒नि॒मि॒ति॑ सु॒प्र॒जा – व॒नि॒म् ।  
 रा॒य॒स्पो॒ष॒व॒नि॒मि॒ति॑ रा॒य॒स्पो॒ष – व॒नि॒म् । प॒री॒ति॑ । ऊ॒हा॒मि॒ । ब्र॒ह्म॑ ।  
 दृ॒ह॒ । क्ष॒त्र॒म् । दृ॒ह॒ । प्र॒जा॒मि॒ति॑ प्र – जा॒म् । दृ॒ह॒ । रा॒यः॑ ।  
 पो॒ष॒म् ( ) । दृ॒ह॒ । प॒रि॒वी॒रि॒ति॑ प॒रि – वीः॑ । अ॒सि॒ । प॒री॒ति॑ ।  
 त्वा॒ । दै॒वीः॑ । वि॒शः॑ । व्य॒य॒न्ता॒म् । प॒री॒ति॑ । इ॒म॒म् । रा॒यः॑ । पो॒षः॑ ।  
 य॒ज॒मा॒न॒म् । म॒नु॒ष्याः॑ । अ॒न्त॒रि॒क्ष॒स्य॑ । त्वा॒ । सा॒नौ॑ । अ॒वेति॑ ।

गू॒हा॒मि॒ ॥ 11 (69)

(उ॒श्म॒सी॒-पो॒ष॒मे॒-का॒न्न॒वि॒श्र॒ति॒श्च॑) (A6)

**TS 1.3.7.1**

इ॒षे त्वो॒प॒वी॒रस्यु॒पो दे॒वान् दै॒वीर्वि॒शः प्रा॒गु॒र्व॒ह्नीरु॒शिजो बृ॒हस्प॑ते  
**धार॒या** व॒सूनि॑ ह॒व्या ते॑ स्व॒दन्तां॑ दे॒व त्व॒ष्टर्व॑सु॒ रण॒व रे॒वती॑ र॒मध्व॑-  
म॒ग्ने र्ज॑नि॒त्रम॑सि॒ वृष॑णौ स्थ॒ उर्व॑श्यस्यायु॒रसि॑ पु॒रुर॒वा घृ॑तेना॒क्ते  
वृष॑णं द॒धाथां॑ गा॒यत्रं॑ छ॒न्दो ऽनु॒ प्र जा॑यस्व त्रै॒ष्टुभं॑ जा॒गतं॑ छ॒न्दो ऽनु॒  
प्र जा॑यस्व भ॒वतं॑- [ ] 12

**1.3.7.1 - Padam**

इ॒षे । त्वा॒ । उ॒प॒वी॒रि॒त्यु॒प – वीः॑ । अ॒सि॒ । उ॒पो इति॑ । दे॒वान् ।  
दै॒वीः । वि॒शः । प्रेति॑ । अ॒गुः । व॒ह्नीः । उ॒शि॒जः । बृ॒हस्प॑ते ।  
धा॒र॒य॒ । व॒सूनि॑ । ह॒व्या । ते॑ । स्व॒दन्ता॑म् । दे॒व । त्व॒ष्टः । व॒सु॒ ।  
रण॒व॒ । रे॒वतीः॑ । र॒मध्व॑म् । अ॒ग्नेः॑ । ज॒नि॒त्रम् । अ॒सि॒ । वृष॑णौ ।  
स्थः॑ । उर्व॑शी । अ॒सि॒ । आ॒युः । अ॒सि॒ । पु॒रुर॒वाः । घृ॑तेन॒ ।  
अ॒क्ते इति॑ । वृष॑णम् । द॒धा॒था॒म् । गा॒य॒त्रम् । छ॒न्दः॑ । अ॒नु॒ । प्रेति॑ ।  
जा॒य॒स्व॒ । त्रै॒ष्टु॒भम् । जा॒ग॒तम् । छ॒न्दः॑ । अ॒नु॒ । प्रेति॑ । जा॒य॒स्व॒ ।  
भ॒व॒तम् । 12 (50)

**TS 1.3.7.2**

नः॑ स॒म॒न॒सौ स॒मो॒क॒सा॒व॒रे॒प॒सौ॑ ।  
मा॒ य॒ज्ञं हि॑ ऽसि॒ष्टं॑ मा॒ य॒ज्ञ॒प॒तिं जा॒त॒वे॒द॒सौ शि॒वौ भ॒व॒त॒म॒द्य नः॑ ॥

अ॒ग्ना॒व॒ग्निश्चरति॑ प्र॒विष्ट॑ ऋ॒षीणां॑ पु॒त्रो अ॒धि॒राज॑ ए॒षः ।  
स्वा॒हाकृत्य॑ ब्र॒ह्मणा॑ ते जुहोमि॒ मा दे॒वानां॑ मिथु॒या क॑र्भा॒गधेयं॑ ॥ 13

### 1.3.7.2 - Padam

नः । सम॒नसा॒विति॑ स – म॒नसौ॑ । समो॒कसा॒विति॑ सं – ओ॒कसौ॑ ।  
अ॒रेप॒सौ ॥ मा । य॒ज्ञम् । हि॒॒सिष्ट॑म् । मा । य॒ज्ञप॑ति॒मिति॑  
य॒ज्ञ – प॒तिम् । जा॒तवे॑दसा॒विति॑ जा॒त – वे॒दसौ॑ । शि॒वौ । भ॒वत्त॑म् ।  
अ॒द्य । नः ॥ अ॒ग्नौ । अ॒ग्निः । च॒रति॑ । प्र॒विष्ट॑ इति॒ प्र – वि॒ष्टः ।  
ऋ॒षीणा॑म् । पु॒त्रः । अ॒धि॒राज॑ इत्य॒धि – रा॒जः । ए॒षः ॥  
स्वा॒हाकृत्ये॑ति स्वा॒हा – कृत्य॑ । ब्र॒ह्मणा॑ । ते । जुहो॑मि । मा ।  
दे॒वाना॑म् । मिथु॒या । कः । भा॒गधे॑यमि॒ति भा॒ग – धे॒यम् ॥ 13 (31)

(भव॑त्-मे॒कत्रि॑ंश॒च्च) (A7)

### TS 1.3.8.1

आ द॒द ऋ॒तस्य॑ त्वा दे॒वह॑विः पा॒शेना॑ऽऽ र॒भे ध॒र्षा  
मा॒नुषा॑न॒द्भ्यस्त्वौष॑धी॒भ्यः प्रो॑क्षा॒म्यपां॑ पे॒रुर॑सि स्वा॒त्तं चि॒त् सद॑ेव॒  
ह॒व्यमा॑पो दे॒वीः स्व॑द॒तैन॑ सं ते प्रा॒णो वा॒युना॑ ग॒च्छता॑ सं  
य॒ज्ञत्रै॑र॒ङ्गानि॑ सं य॒ज्ञप॑तिरा॒शिषा॑ घृ॒तेना॑क्तौ प॒शुं त्रा॑येथा॒  
रे॒वती॑र्य॒ज्ञप॑तिं प्रि॒यधा॑ ऽऽ वि॒शतो॑रो अ॒न्तरि॑क्ष स॒जूर्दे॒वेन॑ – [ ] 14

**1.3.8.1 - Padam**

ए॒ति । द॒दे । ऋ॒तस्य॑ । त्वा॒ । दे॒वह॑वि॒रिति॑ दे॒व – ह॒विः । पा॒शेन॑ ।  
 ए॒ति । र॒भे । ध॒र्ष । मा॒नुषान् । अ॒द्भ्य इ॒त्यत् – भ्यः । त्वा॒ ।  
 ओष॑धी॒भ्य इ॒त्योष॑धि – भ्यः । प्रेति॑ । उ॒क्षामि॑ । अ॒पाम् । पे॒रुः ।  
 अ॒सि । स्वा॒त्तम् । चि॒त् । स॒दे॒वमि॒ति स – दे॒वम् । ह॒व्यम् । आ॒पः ।  
 दे॒वीः । स्व॒दत् । ए॒नम् । स॒मिति॑ । ते । प्रा॒ण इति॑ प्र – अ॒नः ।  
 वा॒युना॑ ॥ ग॒च्छ॒ताम् । स॒मिति॑ । य॒जत्रैः॑ । अ॒ङ्गानि॑ । स॒मिति॑ ।  
 य॒ज्ञप॑ति॒रिति॑ य॒ज्ञ – प॒तिः । आ॒शिषे॑त्या ॥ शि॒षा ॥ घृ॒तेन॑ । अ॒क्तौ ।  
 प॒शुम् । त्रा॒ये॒थाम् । रे॒वतीः॑ । य॒ज्ञप॑ति॒मिति॑ य॒ज्ञ – प॒तिम् ।  
 प्रि॒य॒धेति॑ प्रि॒य – धा । ए॒ति । वि॒शत् । उ॒रो इति॑ । अ॒न्त॒रि॒क्ष ।  
 स॒ज्जूरि॑ति स – जूः । दे॒वेन॑ । 14 (50)

**TS 1.3.8.2**

वा॒तेना॑स्य ह॒विष॑ स्त॒मना॑ य॒ज्ञ स॒मस्य॑ त॒नुवा॑ भ॒व व॒र्षी॑यो व॒र्षी॑य॒सि  
 य॒ज्ञे य॒ज्ञप॑तिं धाः पृ॒थि॒व्याः संपृ॑चः पा॒हि न॑मस्त आ॒ताना॑न॒र्वा प्रेहि॑  
 घृ॒तस्य॑ कु॒ल्याम॑नु॒ सह॑ प्र॒जया॑ सह रा॒यस्पो॑षेणाऽऽपो॑ दे॒वीः शु॒द्धायु॑वः  
 शु॒द्धा यू॒यं दे॒वाः ॥ ऊ॒र्ध्वः ॥ शु॒द्धा व॒यं परि॑विष्टाः परि॒वेष्टा॑रो वो  
 भू॒यास्म ॥ 15

**1.3.8.2 - Padam**

वा॒तेन॑ । अ॒स्य॑ । ह॒विषः॑ । त्मना॑ ॥ य॒ज॒ । स॒मि॒ति॑ । अ॒स्य॑ । त॒नुवा॑ ॥  
 भ॒व॒ । व॒र्षी॑यः । व॒र्षी॑यसि । य॒ज्ञे॑ । य॒ज्ञप॑तिमि॒ति॑ य॒ज्ञ – प॒तिम् ।  
 धाः॑ । पृ॒थि॒व्याः॑ । स॒म्पृ॒च॒ इति॑ स॒म् – पृ॒चः॑ । पा॒हि॒ । न॒मः॑ । ते॒ ।  
 आ॒ता॒ने॒त्या – ता॒न॒ । अ॒न॒र्वा॑ । प्रे॒ति॑ । इ॒हि॒ । घृ॒त॒स्य॑ । कु॒ल्याम् ।  
 अ॒न्वि॒ति॑ । स॒ह॒ । प्र॒ज॒ये॒ति॑ प्र – जया॑ ॥ स॒ह॒ । रा॒यः॑ । पो॒षे॒ण॑ ।  
 आ॒पः॑ । दे॒वीः॑ । शु॒द्धा॒यु॒व॒ इति॑ शु॒द्ध – यु॒वः॑ । शु॒द्धाः॑ । यू॒यम् ।  
 दे॒वान् । ऊ॒ढ॒वम् । शु॒द्धाः॑ । व॒यम् । परि॑विष्टा इति॑ परि – वि॒ष्टाः॑ ।  
 परि॑वेष्टार इति॑ परि – वे॒ष्टारः॑ । वः॑ । भू॒या॒स्म ॥ 15 (44)

(दे॒वेन॑-च॒तुश्च॑त्वारि॒ंशच्च॑) (A8)

**TS 1.3.9.1**

वा॒क्त॒ आ॒ प्या॑यतां प्रा॒णस्त॒ आ॒ प्या॑यतां चक्षु॒स्त॒ आ॒ प्या॑यतां॑ श्रो॒त्रं॑  
 त॒ आ॒ प्या॑यतां॑ या॒ ते प्रा॑णाञ्छुग्-ज॒गाम॒ या चक्षु॑र्या श्रो॒त्रं॑ या॒ त्ते कू॑रं  
 या॒ द॒ास्थि॑तं तत्त॒ आ॒ प्या॑यतां तत्त॒ ए॒तेन॑ शु॒न्धतां॑ नाभि॒स्त॒ आ॒ प्या॑यतां  
 पा॒युस्त॒ आ॒ प्या॑यतां॑ शु॒द्धाश्च॑रि॒त्राः॑ श॒मद्भ्यः॑ – [ ] 16

**1.3.9.1 - Padam**

वाक् । ते॒ । ए॒ति॑ । प्या॒य॒ता॒म् । प्रा॒ण इति॑ प्र – अ॒नः॑ । ते॒ । ए॒ति॑ ।  
 प्या॒य॒ता॒म् । चक्षुः॑ । ते॒ । ए॒ति॑ । प्या॒य॒ता॒म् । श्रो॒त्रम् । ते॒ । ए॒ति॑ ।

प्या॒य॒ता॒म् । या । ते । प्रा॒णानि॑ति प्र – अ॒नान् । शुक् । ज॒गाम । या ।  
चक्षुः । या । श्रो॒त्रम् । यत् । ते । कू॒रम् । यत् ।  
आ॒स्थि॒त॒मि॒त्या – स्थि॒तम् । तत् । ते । ए॒ति । प्या॒य॒ता॒म् । तत् । ते ।  
ए॒तेन॑ । शु॒न्ध॒ता॒म् । नाभिः । ते । ए॒ति । प्या॒य॒ता॒म् । पा॒युः । ते ।  
ए॒ति । प्या॒य॒ता॒म् । शु॒द्धाः । च॒रि॒त्राः । शम् ।  
अ॒द्भ्य इ॒त्यत् – भ्यः । 16 (50)

### TS 1.3.9.2

श॒मोष॑धी॒भ्यः शं पृ॑थि॒व्यै श॒महो॑भ्या-मोष॑धे त्राय॑स्वैन॒ स्व॑धि॒ते  
मै॒न॒ हि॒सी र॑क्ष॒सां भा॒गो ऽसी॑द॒मह॑ र॒क्षो ऽध॑मं त॒मो न॑यामि यौ  
ऽस्मा॑न् द्वेष्टि॒ यं च॑ व॒यं द्वि॒ष्म इ॒दमे॑न॒मध॑मं त॒मो न॑यामी॒षे त्वा घृ॑तेन  
द्या॒वापृ॑थि॒वी प्रो॑र्वा॒था-म॑च्छि॒न्नो रा॑यः सु॒वीर॑ उ॒र्वन्त॑रि॒क्षम॑न्विहि  
वा॒यो वी॑हि ( ) स्तो॒काना॑ स्वा॒होर्द॑ध्व॒नभ॑सं मा॒रुतं॑ गच्छ॒तं ॥ 17

### 1.3.9.2 - Padam

शम् । ओष॑धी॒भ्यः इ॒त्योष॑धि – भ्यः । शम् । पृ॒थि॒व्यै । शम् ।  
अ॒हो॑भ्या॒मित्य॑हः – भ्याम् । ओष॑धे । त्राय॑स्व । ए॒नम् ।  
स्व॑धि॒त इति॑ स्व – धि॒ते । मा । ए॒नम् । हि॒सीः । र॑क्ष॒साम् ।  
भा॒गः । अ॒सि । इ॒दम् । अ॒हम् । र॑क्षः । अ॒ध॒मम् । त॒मः । न॑यामि ।

यः । अ॒स्मान् । द्वेष्टि॑ । यम् । च॒ । व॒यम् । द्विष्मः॑ । इ॒दम् । ए॒नम् ।  
 अ॒ध॒मम् । तमः॑ । न॒यामि॑ । इ॒षे । त्वा॒ । घृ॒तेन॑ । द्या॒वापृ॑थि॒वी इति॑  
 द्या॒वा – पृ॒थि॒वी । प्रेति॑ । ऊ॒र्ण्वा॒थाम् । अ॒च्छिन्नः॑ । रा॒यः ।  
 सु॒वीर॑ इति॑ सु – वी॒रः । उ॒रु । अ॒न्तरि॑क्षम् । अ॒न्विति॑ । इ॒हि ।  
 वा॒यो इति॑ । वी॒ति । इ॒हि ( ) । स्तो॒काना॑म् । स्वाहा॑ ।  
 ऊ॒र्ध्व॒न॒भ॒स॒मित्यूर्ध्व॑ – न॒भ॒सम् । मा॒रु॒तम् । ग॒च्छ॒तम् ॥ 17 (55)

(अ॒द्भ्यो-वी॒हि-पञ्च॑ च) (A9)

### TS 1.3.10.1

सं ते॑ म॒नसा॑ म॒नः । सं प्रा॒णेन॑ प्रा॒णो जुष्टं॑ दे॒वेभ्यो॑ ह॒व्यं  
 घृ॒तव॑त् स्वा॒हैन्द्रः॑ प्रा॒णो अ॒ङ्गेअ॒ङ्गे नि॑ दे॒द्ध्यदैन्द्रो॑ ऽपानो॑ अ॒ङ्गेअ॒ङ्गे  
 वि॒ बो॒भुव॑द्-दे॒व त्वष्ट॑र्भूरि॑ ते स॒समे॑तु वि॒षुरूपा॑ यत् स॒लक्ष्मा॑णो  
 भव॑त् दे॒वत्रा॑ यन्त॒मव॑से स॒खायो॑ ऽनु॒ त्वा मा॒ता पि॒तरो॑ म॒दन्तु॑  
 श्री॒रस्य॑ग्निस्त्वा॑ श्री॒णात्वा॑पः॒ सम॑रिणन् वा॒तस्य॑ – [ ] 18

### 1.3.10.1 - Padam

स॒मिति॑ । ते॑ । म॒नसा॑ । म॒नः । स॒मिति॑ । प्रा॒णेनेति॑ प्र – अ॒नेन॑ ।  
 प्रा॒ण इति॑ प्र – अ॒नः । जुष्ट॑म् । दे॒वेभ्यः॑ । ह॒व्यम् ।  
 घृ॒तव॑दिति॑ घृ॒त – व॒त् । स्वाहा॑ । ऐ॒न्द्रः । प्रा॒ण इति॑ प्र – अ॒नः ।

अङ्गे॑अङ्ग॑ इत्यङ्गे॑ – अङ्गे॑ । नीति॑ । दे॒ध्यत् । ऐन्द्रः॑ ।  
 अ॒पा॒न इत्यप॑ – अ॒नः । अङ्गे॑अङ्ग॑ इत्यङ्गे॑ – अङ्गे॑ । वीति॑ ।  
 बो॒भु॒वत् । दे॒व । त्वष्टः॑ । भूरि॑ । ते । स॒स॒मि॒ति सं – सम् । ए॒तु ।  
 वि॒षु॒रू॒पा इति॑ वि॒षु – रू॒पाः ।  
 यत् । स॒लक्ष्मा॑ण इति॑ स – लक्ष्मा॑णः । भव॑थ । दे॒व॒त्रेति॑ दे॒व-त्रा॑ ।  
 यन्त॑म् । अ॒व॒से । स॒खायः॑ । अ॒न्वि॒ति । त्वा । मा॒ता । पि॒तरः॑ ।  
 म॒द॒न्तु । श्रीः॑ । अ॒सि । अ॒ग्निः । त्वा । श्री॑णा॒तु । आ॒पः । स॒मि॒ति ।  
 अ॒रि॒णन् । वा॒त॒स्य । 18 (50)

### TS 1.3.10.2

त्वा ध्रज्यै॑ पू॒ष्णो र॒ह्या अ॒पा॒मोष॑धीना॒ र॒ रोहि॑ष्यै घृ॒तं घृ॒तपा॑वानः  
 पि॒बत॑ वसां॑ वसा॒पा॒वानः पि॒बतान्तरि॑क्षस्य ह॒वि॒र॒सि स्वाहा॑  
 त्वा ऽन्तरि॑क्षाय दि॒शः प्र॒दिश॑ आ॒दिशो॑ वि॒दिश॑ उ॒द्दिशः॑ स्वाहा दि॒ग्भ्यो  
 नमो॑ दि॒ग्भ्यः ॥ 19

### 1.3.10.2 - Padam

त्वा । ध्रज्यै॑ । पू॒ष्णः । र॒ह्यै । अ॒पाम् । ओष॑धीनाम् । रोहि॑ष्यै ।  
 घृ॒तम् । घृ॒तपा॑वान इति॑ घृ॒त – पा॒वानः । पि॒बत॑ । वसा॑म् ।  
 वसा॑पा॒वान इति॑ वसा – पा॒वानः । पि॒बत॑ । अ॒न्तरि॑क्षस्य । ह॒विः ।



अ॒सि॒ । स्वा॒हा । त्वा॒ । अ॒न्तरि॑क्षाय॒ । दि॒शः॑ । प्र॒दि॒श इति॑  
 प्र – दि॒शः॑ । आ॒दि॒श इत्या॑ – दि॒शः॑ । वि॒दि॒श इति॑ वि – दि॒शः॑ ।  
 उ॒दि॒श इत्यु॑त् – दि॒शः॑ । स्वा॒हा । दि॒ग्भ्य इति॑ दिक् – भ्यः॑ । नमः॑ ।  
 दि॒ग्भ्य इति॑ दिक् – भ्यः॑ ॥ 19 (28)

(वा॒तस्या॑-ष्टा॒वि॒शति॑श्च) (A10)

### TS 1.3.11.1

स॒मु॒द्रं ग॒च्छ स्वा॒हा ऽन्तरि॑क्षं ग॒च्छ स्वा॒हा दे॒व॒ स॒वि॒तारं॑ ग॒च्छ  
 स्वा॒हा ऽहो॑रात्रे ग॒च्छ स्वा॒हा मि॒त्राव॑रुणौ ग॒च्छ स्वा॒हा सोमं॑ ग॒च्छ  
 स्वा॒हा य॒ज्ञं ग॒च्छ स्वा॒हा छन्दा॑सि ग॒च्छ स्वा॒हा द्या॒वापृ॑थि॒वी ग॒च्छ  
 स्वा॒हा न॒भो दि॒व्यं ग॒च्छ स्वा॒हा ऽग्निं॑ वै॒श्वान॑रं ग॒च्छ स्वा॒हा  
 ऽद्भ्य॑स्त्वौष॒धीभ्यो॑ म॒नो मे॒ हार्दि॑ य॒च्छ त॒नूं त्वचं॑ पु॒त्रं न॒प्तार॑मशी॒य  
 शु॒ग॒सि ( ) त॒म॒भि शो॑च॒ यो ऽस्मा॑न् द्वेष्टि॒ यं च॑ व॒यं द्वि॒ष्मो  
 धा॒म्नोधा॑म्नो रा॒ज॒न्नि॒तो व॑रुण॒ नो मु॒ञ्च॒ यदा॑पो अ॒घ्नि॒या व॑रु॒णेति॑  
 श॒पा॒महे॑ ततो॑ व॒रुण॒ नो मु॒ञ्च ॥ 20

### 1.3.11.1 - Padam

स॒मु॒द्रम् । ग॒च्छ । स्वा॒हा । अ॒न्तरि॑क्षम् । ग॒च्छ । स्वा॒हा । दे॒वम् ।  
 स॒वि॒तारम् । ग॒च्छ । स्वा॒हा । अ॒हो॒रात्रे॑ इत्य॒हः – रा॒त्रे । ग॒च्छ ।

॥ स्वाहा । मि॒त्रावरु॑णा॒विति॑ मि॒त्रा – वरु॑णौ । गच्छ । स्वाहा । सोम॑म् ।  
 गच्छ । स्वाहा । य॒ज्ञम् । गच्छ । स्वाहा । छन्दा॑ँसि । गच्छ ।  
 स्वाहा । द्या॒वापृ॑थि॒वी इति॑ द्या॒वा – पृ॒थि॒वी । गच्छ । स्वाहा ।  
 नभः॑ । दि॒व्यम् । गच्छ । स्वाहा । अ॒ग्निम् । वै॒श्वान॑रम् । गच्छ ।  
 स्वाहा । अ॒द्भ्य इत्य॑त् – भ्यः । त्वा । ओष॑धी॒भ्य  
 इत्योष॑धि – भ्यः । मनः॑ । मे । हार्दि॑ । यच्छ । त॒नूम् । त्वच॑म् ।  
 पु॒त्रम् । न॒प्तार॑म् । अ॒शीय॑ । शुक् । अ॒सि ( ) । तम् । अ॒भीति॑ ।  
 शोच॑ । यः । अ॒स्मान् । द्वेष्टि॑ । यम् । च । व॒यम् । द्विष्मः॑ ।  
 धाम्नो॑धा॒मन् इति॑ धाम्नः॑ – धाम्नः॑ । राज॑न् । इतः॑ । वरु॑ण । नः ।  
 मुञ्च॑ । यत् । आपः॑ । अ॒घ्नियाः॑ । वरु॑ण । इति॑ । श॒पाम॑हे ।  
 ततः॑ । वरु॑ण । नः । मुञ्च॑ ॥ 20 (76)

(अ॒सि-ष॒ड्विं॑शतिश्च ) (A11)

TS 1.3.12.1

ह॒विष्म॑ती॒रिमा॑ आ॒पो ह॒विष्मा॑न् दे॒वो अ॑द्ध्व॒रो ह॒विष्मा॑ँ आ  
 वि॒वास॑ति ह॒विष्मा॑ँ अस्तु॑ सूर्यः॑ ॥

अ॒ग्नेर्वो॑ ऽप॒न्नगृ॑हस्य॒ सद॑सि सा॒दयामि॑ सु॒म्नाय॑ सु॒म्निनीः॑ सु॒म्ने मा॑

धत्तेन्द्रा॑ग्नियो॒र् भा॒ग॒धेयीः॑ स्थ मि॒त्राव॑रुणयो॒र् भा॒ग॒धेयीः॑ स्थ विश्वे॒षां  
दे॒वानां॑ भा॒ग॒धेयीः॑ स्थ य॒ज्ञे जा॑गृत ॥ 21

**1.3.12.1 - Padam**

ह॒विष्म॑तीः । इ॒माः । आ॒पः । ह॒विष्मा॑न् । दे॒वः । अ॒ध्व॒रः ।  
ह॒विष्मा॑न् । ए॒ति । वि॒वा॒स॒ति । ह॒विष्मा॑न् । अ॒स्तु । सूर्यः॑ ॥ अ॒ग्नेः ।  
वः । अ॒प॒न्न॒गृ॒ह॒स्येत्य॑प॒न्न- गृ॒ह॒स्य । स॒द॒सि । सा॒द॒या॒मि । सु॒म्नाय॑ ।  
सु॒म्निनीः॑ । सु॒म्ने । मा । ध॒त्त । इ॒न्द्रा॑ग्नियो॒रितीन्द्र॑ - अ॒ग्नि॒योः ।  
भा॒ग॒धेयी॑रिति भा॒ग - धेयीः॑ । स्थ ।  
मि॒त्राव॑रुणयो॒रिति मि॒त्रा - व॑रुणयोः । भा॒ग॒धेयी॑रिति भा॒ग - धेयीः॑ ।  
स्थ । विश्वे॒षाम् । दे॒वाना॑म् । भा॒ग॒धेयी॑रिति भा॒ग - धेयीः॑ । स्थ ।  
य॒ज्ञे । जा॑गृत ॥ 21 (34) (ह॒विष्म॑ती-श्चतु॒स्त्रिं॑शत्) (A12)

**TS 1.3.13.1**

ह॒दे त्वा॒ मन॑से त्वा दि॒वे त्वा॒ सूर्या॑य त्वो॒र्ध्वमि॑मम॒ध्व॒रं कृ॑धि दि॒वि  
दे॒वेषु॑ हो॒त्रा य॑च्छ सोम॒ राज॑न्नेह्यव रोह॒ मा भे॑र्मा सं वि॒क्था मा॒ त्वा  
हि॒सि॒षं प्र॑जास्त्व-मु॒पाव॑रोह प्र॒जास्त्वा-मु॒पाव॑रोहन्तु शृ॒णो॒त्व॒ग्निः  
स॒मि॒धा ह॒वं मे॑ शृ॒ण्वन्त्वा॑पो धि॒षणा॑श्च दे॒वीः ॥  
शृ॒णो॒त ग्रा॑वा॒णो वि॒दुषो॑ नु - [ ] 22

**1.3.13.1 - Padam**

हृ॒दे । त्वा॒ । मन॑से । त्वा॒ । दि॒वे । त्वा॒ । सू॒र्या॑य । त्वा॒ । ऊ॒र्ध्व॑म् ।  
इ॒मम् । अ॒र्ध्व॑रम् । कृ॒धि॒ । दि॒वि । दे॒वेषु॑ । हो॒त्राः॑ । य॒च्छ॒ । सोम॑ ।  
रा॒ज॒न् । ए॒ति । इ॒हि॒ । अ॒वे॒ति॒ । रो॒ह॒ । मा॒ । भेः॑ । मा॒ । स॒मि॒ति॒ ।  
वि॒क्त्वाः॑ । मा॒ । त्वा॒ । हि॒॒सि॒षम् । प्र॒जा इति॑ प्र – जाः । त्वम् ।  
उ॒पा॒व॒रो॒हे॒त्युप॑ – अ॒व॒रो॒ह॒ । प्र॒जा इति॑ प्र – जाः । त्वाम् ।  
उ॒पा॒व॒रो॒ह॒न्त्वि॒त्युप॑ – अ॒व॒रो॒ह॒न्तु॑ । शृ॒णो॒तु॑ । अ॒ग्निः॑ ।  
स॒मि॒धे॒ति॒ सम् – इ॒धा॑ । ह॒वम् । मे॒ । शृ॒ण्व॑न्तु॑ । आ॒पः॑ । धि॒ष॒णाः॑ ।  
च॒ । दे॒वीः॑ ॥ शृ॒णो॒त॑ । ग्रा॒वा॒णः॑ । वि॒दु॒षः॑ । नु॒ । 22 (50)

**TS 1.3.13.2**

य॒ज्ञं॑ शृ॒णो॒तु॑ दे॒वः स॒वि॒ता ह॒वं मे॑ ।  
दे॒वी॒रा॒पो अ॒पां न॒पाद्-य॑ ऊ॒र्मि॒र् । ह॒वि॒ष्य॑ इ॒न्द्रि॒या॒वा॒न्-म॒दि॒न्त॑म॒स्तं॑  
दे॒वे॒भ्यो॑ दे॒व॒त्रा ध॑त्त॒ शु॒क्रं॑ शु॒क्र॒पे॒भ्यो॑ येषां॑ भा॒गः स्थ॑ स्वाहा  
का॒र्षि॒र॒स्य॒पा॒पां मृ॒द्धं॑ स॒मु॒द्र॒स्य॒ वो ऽक्षि॑त्या उ॒न्नये॑ ॥  
य॒म॒ग्ने पृ॒थ्सु॑ म॒र्त्य॒मा॒वो वा॒जे॒षु यं जु॑नाः ।  
स य॒न्ता श॑श्व॒ती॒रि॒षः॑ ॥ 23

**1.3.13.2 - Padam**

य॒ज्ञम् । शृ॒णोतु॑ । दे॒वः । स॒वि॒ता । ह॒वम् । मे॒ ॥ दे॒वीः । आ॒पः ।  
 अ॒पाम् । न॒पात् । यः । ऊ॒र्मिः । ह॒वि॒ष्यः ।  
 इ॒न्द्रि॒यावा॒नितीन्द्रि॒य – वा॒न् । म॒दि॒न्त॒मः । तम् । दे॒वेभ्यः॑ । दे॒व॒त्रेति॑  
 दे॒व – त्रा । ध॒त्त । शु॒क्रम् । शु॒क्र॒पेभ्य॑ इति शु॒क्र – पे॒भ्यः ।  
 ये॒षाम् । भा॒गः । स्थ । स्वा॒हा । कार्॒षिः । अ॒सि । अ॒पेति॑ ।  
 अ॒पाम् । मृ॒द्ध॒म् । स॒मु॒द्र॒स्य । वः । अ॒क्षि॒त्यै । उ॒दि॒ति । न॒ये ॥  
 यम् । अ॒ग्ने । पृ॒थि॒स्वति॑ पृ॒त् – सु । म॒र्त्यम् । आ॒वः । वा॒जेषु॑ ।  
 यम् । जु॒नाः ॥ सः । य॒न्ता । श॒श्वतीः॑ । इ॒षः ॥ 23 (47)

(नु – सप्तचत्वारिंशच्च) (A13)

**TS 1.3.14.1**

त्व॒मग्ने॑ रु॒द्रो अ॒सुरो॑ म॒हो दि॒वस्त्व॑ श॒र्द्धो॑ मा॒रुतं॑ पृ॒क्ष ई॒शिषे॑ ।  
 त्वं वा॒तैर॒रुणै॒र्या॒सि श॑ंग॒यस्त्वं॑ पू॒षा वि॒धतः॑ पा॒सि नु॑ त्म॒ना ॥  
 आ वो॒ राजा॑न॒मध्व॑र॒स्य रु॒द्र॑ हो॒तार॑ स॒त्यय॑ज॒रोद॑स्योः ।  
 अ॒ग्निं पु॒रा त॑नयि॒न्नो र॑चि॒त्ताद्वि॑रण्य॒रूप॑म॒वसे॑ कृ॒णु॒ध्वं ॥  
 अ॒ग्निर्. हो॒ता नि॒ ष॒सादा॑ य॒जीया॑नुप॒स्थे मा॒तुः सु॑र॒भावु॑ लो॒के ।  
 यु॒वा क॒विः पु॒रु॒निष्ठ॑ – [ ] 24

**1.3.14.1 - Padam**

त्वम् । अग्ने । रुद्रः । असुरः । महः । दिवः । त्वम् । शर्द्धः ।  
 मारुतम् । पृक्षः । ईशिषे ॥ त्वम् । वातैः । अरुणैः । यासि । शङ्ग्य  
 इति शं – गयः । त्वम् । पूषा । विधत् इति वि-धत्तः । पासि । नु ।  
 त्मना ॥ एति । वः । राजानम् । अर्ध्वरस्य । रुद्रम् । होतारम् ।  
 सत्ययजमिति सत्य – यजम् । रोदस्योः ॥ अग्निम् । पुरा ।  
 तनयिलोः । अचित्तात् । हिरण्यरूपमिति हिरण्य – रूपम् ।  
 अवसे । कृणुर्ध्वम् ॥ अग्निः । होता । नीति । ससाद । यजीयान् ।  
 उपस्थ इत्युप – स्थे । मातुः । सुरभौ । उ । लोके ॥ युवा ॥  
 कविः । पुरुनिष्ठ इति पुरु – निष्ठः । 24 (50)

**TS 1.3.14.2**

ऋतावा धर्ता कृष्टीनामुत मर्ध्य इद्धः ॥  
 साध्वीमकर् देववीतिं नो अद्य यज्ञस्य जिह्वामविदाम गुह्यां ।  
 स आयुरा ऽगाथसुरभिर् वसानो भद्रामकर् देवहूतिं नो अद्य ॥  
 अक्रन्ददग्निः स्तनयन्निव द्यौः क्षामा रेरिहद्-वीरुधः समञ्जन् ।  
 सद्यो जज्ञानो वि हीमिद्धो अख्यदा रोदसी भानुना भात्यन्तः ॥  
 त्वे वसूनि पुर्वणीक – [ ] 25

**1.3.14.2 - Padam**

ऋ॒तावे॒त्यृ॒ता – वा॒ । ध॒र्ता । कृ॒ष्टी॒नाम् । उ॒त । म॒द्ध्ये॑ ॥ इ॒द्धः ॥  
सा॒द्ध्ये॒वीम् । अ॒कः । दे॒व॒वी॒ति॒मि॒ति॒ दे॒व – वी॒तिम् । नः । अ॒द्य ।  
य॒ज्ञस्य॑ । जि॒ह्वाम् । अ॒वि॒दाम् । गु॒ह्याम् ॥ सः । आ॒युः । ए॒ति ।  
अ॒गात् । सु॒रभिः॑ । व॒सानः । भ॒द्राम् । अ॒कः । दे॒व॒हू॒ति॒मि॒ति॒  
दे॒व – हू॒तिम् । नः । अ॒द्य ॥ अ॒क्र॒न्दत् । अ॒ग्निः । स्त॒नय॑न् । इ॒व ।  
द्यौः । क्षाम् । रे॒रि॒हत् । वी॒रु॒धः । स॒म॒ञ्ज॒न्निति॑ सं – अ॒ञ्जन् ॥  
स॒द्यः । ज॒ज्ञानः॑ । वी॒ति । हि । ई॒म् । इ॒द्धः । अ॒ख्य॑त् । ए॒ति ।  
रो॒दसी॑ इति॑ । भा॒नुना॑ ॥ भा॒ति । अ॒न्तः ॥ त्वे॑ इति॑ । व॒सूनि॑ ।  
पु॒र्व॒णी॒के॒ति॒ पु॒रु – अ॒नी॒क । 25 (50)

**TS 1.3.14.3**

हो॒त॒र्दो॒षा व॒स्तो॒रे॒रि॒रे य॒ज्ञि॒यासः॑ ।  
क्षामे॑व वि॒श्वा भु॒वनानि॑ यस्मि॒न्त्सꣳ सौ॒भ॒गानि॑ दधि॒रे पा॒वके॑ ॥  
तु॒भ्यं ता॑ अ॒ङ्गि॒रस्त॑म वि॒श्वाः सु॒क्षि॒तयः॑ पृथक् ।  
अ॒ग्ने का॒माय॑ येमि॒रे ॥  
अ॒श्याम॑ तं का॒मम॑ग्ने तवो॒त्यश्याम॑ रयिꣳ रयि॒वः सु॒वीरं॑ ॥

अ॒श्या॒म वा॒ज॒म॒भि वा॒ज॒य॒न्तो ऽश्या॒म द्यु॒म्न॒म॒ज॒रा॒जरं॒ ते ॥

श्रे॒ष्ठं य॒वि॒ष्ठ भा॒रता॒ग्ने द्यु॒म॒न्त॒मा भ॒र । 26

### 1.3.14.3 - Padam

हो॒तः । दो॒षा । व॒स्तोः । ए॒ति । ई॒रि॒रे । य॒ज्ञि॒या॒सः ॥ क्षा॒म । इ॒व ।

वि॒श्वा । भु॒व॒ना॒नि । य॒स्मि॒न् । स॒मि॒ति । सौ॒भ॒गा॒नि । द॒धि॒रे ।

पा॒व॒के ॥ तु॒भ्य॒म् । ताः । अ॒ङ्गि॒र॒स्त॒मे॒त्य॒ङ्गि॒रः – त॒म । वि॒श्वाः ।

सु॒क्षि॒त॒य इ॒ति सु – क्षि॒त॒यः । पृ॒थक् ॥ अ॒ग्ने । का॒मा॒य । ये॒मि॒रे ॥

अ॒श्या॒म । त॒म् । का॒म॒म् । अ॒ग्ने । त॒व । ऊ॒ती । अ॒श्या॒म । र॒यि॒म् ।

र॒यि॒व इ॒ति र॒यि – वः । सु॒वी॒र॒मि॒ति सु॒-वी॒र॒म् ॥ अ॒श्या॒म । वा॒ज॒म् ।

अ॒भी॒ति । वा॒ज॒य॒न्तः । अ॒श्या॒म । द्यु॒म्न॒म् । अ॒ज॒र । अ॒ज॒र॒म् । ते ॥

श्रे॒ष्ठ॒म् । य॒वि॒ष्ठ । भा॒र॒त । अ॒ग्ने । द्यु॒म॒न्त॒मि॒ति द्यु – म॒न्त॒म् । ए॒ति ।

भ॒र ॥ 26 (50)

### TS 1.3.14.4

व॒सो पु॒रु॒स्पृ॒ह र॒यिं ॥

स श्चि॒ता॒न॒स्त॒न्य॒तू रो॒च॒न॒स्था अ॒ज॒रे॒भिर् नान॑द॒द्भि॒र्य॒वि॒ष्ठः ।

यः पा॒व॒कः पु॒रु॒त॒मः पु॒रू॒णि पृ॒थू॒न्य॒ग्नि॒रनु॒या॒ति भ॒र्व॒न् ॥

आ॒यु॒ष्टे वि॒श्व॒तो द॒ध॒द॒य॒म॒ग्नि॒र् व॒रे॒ण्यः ।



पुनस्ते प्राण आ ऽयति परा यक्ष्मं सुवामि ते ॥

आयुर्दा अग्ने हविषो जुषाणो घृतप्रतीको घृतयोनिरेधि ॥

घृतं पीत्वा मधु चारु गव्यं पितेव पुत्रमभि – [ ] 27

**1.3.14.4 - Padam**

वसो इति । पुरुस्पृहमिति पुरु- स्पृहम् । रयिम् ॥ सः । श्वितानः ।

तन्यतुः । रोचनस्था इति रोचन – स्थाः । अजरेभिः ।

नानदद्भिरिति नानदत् – भिः । यविष्ठः ॥ यः । पावकः । पुरुतम इति

पुरु-तमः । पुरुणि । पृथूनि । अग्निः । अनुयातीत्यनु – याति ।

भर्वन् ॥ आयुः । ते । विश्वतः । दधत् । अयम् । अग्निः । वरेण्यः ॥

पुनः । ते । प्राण इति प्र – अनः । एति । अयति । परेति । यक्ष्मम् ।

सुवामि । ते ॥ आयुर्दा इत्यायुः – दाः । अग्ने । हविषः । जुषाणः ।

घृतप्रतीक इति घृत – प्रतीकः । घृतयोनिरिति घृत- योनिः ।

एधि ॥ घृतम् । पीत्वा । मधु । चारु । गव्यम् । पिता । इव । पुत्रम् ।

अभीति । 27 (50)

**TS 1.3.14.5**

रक्षतादिमं ।

तस्मै ते प्रतिहर्यते जातवेदो विचर्षणे । अग्ने जनानि सुष्टुतिं ॥

दिव॑स्प॒रि प्र॒थ॒मं ज॒ज्ञे अ॒ग्नि॒रस्मद् द्वितीयं॑ परि॒ जा॒तवे॒दाः ।

तृतीय॑म॒प्सु नृ॒मणा॑ अज॒स्रमि॒न्धान॑ ए॒नं ज॒रते॑ स्वा॒धीः ॥

शुचिः॑ पा॒वक॑ व॒न्द्यो अ॒ग्ने बृ॒हद्-वि॒रोच॑से ।

त्वं घृ॒तेभि॒राहु॑तः ॥

दृ॒शा॒नो रु॒क्म उ॒र्व्या व्य॑द्यौद्-दु॒र्मर्ष॑मायुः श्रि॒ये रु॒चा॒नः ॥

अ॒ग्नि॒रमृ॒तो अ॒भवद्-वयो॑भिर् - [ ] 28

### 1.3.14.5 - Padam

र॒क्ष॒तात् । इ॒मम् ॥ तस्मै॑ । ते । प्र॒ति॒ह॒र्य॒त इति॑ प्र॒ति - ह॒र्य॒ते ।

जा॒तवे॒द इति॑ जा॒त - वे॒दः । वि॒चर्ष॑ण इति॑ वि - च॒र्ष॒णे ॥

अ॒ग्ने । ज॒ना॒मि । सु॒ष्टु॒तिमि॑ति सु - स्तु॒तिम् ॥ दि॒वः । प॒री॒ति ।

प्र॒थ॒मम् । ज॒ज्ञे । अ॒ग्निः । अ॒स्मत् । द्वितीय॑म् । प॒री॒ति । जा॒तवे॒दा

इति॑ जा॒त - वे॒दाः ॥ तृतीय॑म् । अ॒प्स्वि॒त्यप् - सु । नृ॒मणा॑ इति॑

नृ - म॒नाः । अज॒स्रम् । इ॒न्धा॒नः । ए॒नम् । ज॒रते॑ । स्वा॒धीरि॑ति

स्व - धीः ॥ शुचिः॑ । पा॒वक॑ । व॒न्द्यः । अ॒ग्ने । बृ॒हत् । वी॒ति ।

रो॒च॒से ॥ त्वम् । घृ॒तेभिः॑ । आ॒हु॒त इत्या॑ - हु॒तः ॥ दृ॒शा॒नः ।

रु॒क्मः । उ॒र्व्या । वी॒ति । अ॒द्यौत् । दु॒र्मर्ष॑मि॒ति दुः- मर्ष॑म् ।

आ॒युः । श्रि॒ये । रु॒चा॒नः ॥ अ॒ग्निः । अ॒मृतः । अ॒भ॒वत् ।

वयो॑भिरिति वयः – भिः । 28 (50)

**TS 1.3.14.6**

यदे॒नं द्यौ॑र॒जन॒यत्सु॑रेताः ॥

आ य॒दि॒षे नृ॒पतिं॑ ते॒ज आ॒न॒ट्छु॒चि रे॒तो नि॒षि॒क्तं द्यौ॑र॒भीके॑ ॥

अ॒ग्निः श॒र्द्धम॑न॒वद्यं यु॑वा॒नꣳ स्वा॒धियं॑ ज॒नय॑त्सू॒दय॑च्च ॥

स ते॒जी॒यसा॑ म॒नसा॑ त्वो॒त उ॒त शि॒क्ष स्व॒प॒त्यस्य॑ शि॒क्षोः ।

अ॒ग्ने रा॒यो नृ॒तम॑स्य प्र॒भू॒तौ भू॒याम॑ ते सु॒ष्टु॒तय॑श्च व॒स्वः ॥

अ॒ग्ने स॒ह॒न्त॒मा भ॑र द्यु॒म्नस्य॑ प्रा॒सहा॑ र॒यिं ॥ वि॒श्वा य – [ ] 29

**1.3.14.6 - Padam**

यत् । ए॒नम् । द्यौः । अ॒ज॒न॒यत् । सु॒रेता॑ इति सु॒रेताः ॥ ए॒ति । यत् ।

इ॒षे । नृ॒प॒ति॒मि॒ति नृ॑ – प॒तिम् । ते॒जः । आ॒न॒ट् । शु॒चि । रे॒तः ।

नि॒षि॒क्त॒मि॒ति नि॑ – सि॒क्तम् । द्यौः । अ॒भी॒के ॥ अ॒ग्निः । श॒र्द्धम् ।

अ॒न॒व॒द्यम् । यु॑वा॒नम् । स्वा॒धिय॑मि॒ति स्व॑ – धि॒यम् । ज॒न॒यत् ।

सू॒द॒यत् । च ॥ सः । ते॒जी॒यसा॑ । म॒नसा॑ । त्वो॒तः । उ॒त । शि॒क्ष ।

स्व॒प॒त्यस्ये॑ति सु॒ – अ॒प॒त्यस्य॑ । शि॒क्षोः ॥ अ॒ग्ने । रा॒यः ।

नृ॒तम॑स्येति नृ॒ – त॒मस्य॑ । प्र॒भू॒ता॒वि॒ति प्र॑ – भू॒तौ । भू॒याम॑ । ते ।

सु॒ष्टु॒तय॑ इति सु – स्तु॒तयः॑ । च॑ । वस्वः॑ ॥ अ॒ग्ने॑ । स॒हन्त॑म् ।

एति॑ । भ॒र॑ । द्यु॒म्नस्य॑ । प्रा॒सहेति॑ प्र – सहा॑ । र॒यिम्॑ ॥

विश्वाः॑ । यः॑ । 29 (50)

**TS 1.3.14.7**

श्च॒र्ष॒णीर॒भ्यासा॑ वा॒जे॒षु सा॒सह॑त् ॥

तम॑ग्ने पृ॒तना॑सह॑ र॒यि॑ सह॒स्व आ॑ भ॒र॑ ।

त्व॑ हि स॒त्यो अ॒द्भुतो॑ दा॒ता वा॒जस्य॑ गो॒मतः॑ ॥

उ॒क्षान्ना॑य व॒शान्ना॑य सोम॑पृ॒ष्ठाय वे॒धसे॑ ॥

स्तोमै॑र्वि॒धेमा॑ग्नये ॥

व॒द्मा हि सू॒नो अ॒स्य॒द्वस॒द्वा च॒क्रे अ॒ग्निर्ज॒नुषा॑ ऽज्मा॒न्त्रं॑ ।

स त्वं॑ न ऊ॒र्ज॒सन॑ ऊ॒र्जं धा॒ राजे॑व जे॒रवृ॑के क्षे॒ष्यन्तः॑ ॥

अ॒ग्न आ॒यू॑षि – [ ] 30

**1.3.14.7 - Padam**

च॒र्ष॒णीः । अ॒भीति॑ । आ॒सा । वा॒जे॒षु । सा॒सह॑त् ॥ तम् । अ॒ग्ने॑ ।

पृ॒तना॑सह॑मिति पृ॒तना॑ – सह॑म् । र॒यिम् । सह॒स्वः । एति॑ । भ॒र॑ ॥

त्वम् । हि । स॒त्यः । अ॒द्भुतः॑ । दा॒ता । वा॒जस्य॑ । गो॒मत॑ इति

गो – म॒तः ॥ उ॒क्षान्ना॒येत्यु॒क्ष – अ॒न्नाय॑ । व॒शान्ना॒येति॑  
 व॒शा – अ॒न्नाय॑ । सोम॑पृ॒ष्ठाय॑ेति॒ सोम॑ – पृ॒ष्ठाय॑ । वे॒धसे॑ ॥ स्तोमैः॑ ।  
 वि॒धेम॑ । अ॒ग्नये॑ ॥ व॒द्मा । हि । सू॒नो इति॑ । अ॒सि ।  
 अ॒द्भस॑द्वेत्य॒द्भ – स॒द्वा । च॒क्रे । अ॒ग्निः । ज॒नुषा॑ । अ॒ज्म । अ॒न्नम् ॥  
 सः । त्वम् । नः । ऊ॒र्ज॒सन॑ इत्यूर्ज॑ – स॒ने । ऊ॒र्जम् । धाः । रा॒जा ।  
 इ॒व । जेः । अ॒वृ॒के । क्षे॒षि । अ॒न्तः ॥ अ॒ग्ने । आ॒यू॒षि । 30 (50)

**TS 1.3.14.8**

पव॑स आ सु॒वोर्ज॑मि॒षं च नः॑ ।  
 आ॒रे बा॑धस्व दु॒च्छुनां॑ ॥  
 अ॒ग्ने पव॑स्व स्व॒पा अ॒स्मे वर्चः॑ सु॒वीर्यं॑ ।  
 द॒धत्पोष॑ र॒यिं म॒यि ॥  
 अ॒ग्ने पा॑वक रो॒चिषा॑ म॒न्द्रया॑ दे॒व जिह्वा॑ ।  
 आ दे॒वान् व॑क्षि य॒क्षि च॑ ॥  
 स नः॑ पा॒वक॑ दी॒दिवो॑ ऽग्ने दे॒वा इ॒हा वह॑ ।  
 उ॒प य॒ज्ञ ह॑विश्च नः॑ ॥  
 अ॒ग्निः शु॒चि॒व्रत॑तमः शु॒चि॒र्वि॒प्रः शु॒चिः ( ) क॒विः ।  
 शु॒ची रो॑चत आ॒हुतः॑ ॥

उदग्ने शुचयस्तव शुक्रा भ्राजन्त ईरते ।

तव ज्योतीर्ष्यर्चयः ॥ 31

**1.3.14.8 - Padam**

पव॒से । ए॒ति । सु॒व । ऊ॒र्जम् । इ॒षम् । च । नः ॥ आ॒रे । बा॒धस्व ।  
 दु॒च्छु॒नाम् ॥ अ॒ग्ने । पव॒स्व । स्व॒पा इति सु – अ॒पाः । अ॒स्मे इति ।  
 व॒र्चः । सु॒वीर्य॒मिति सु – वी॒र्यम् ॥ द॒धत् । पो॒षम् । र॒यिम् । म॒यि ॥  
 अ॒ग्ने । पा॒व॒क । रो॒चिषा॑ । म॒न्द्रया॑ । दे॒व । जि॒ह्वाया॑ ॥ ए॒ति । दे॒वान् ।  
 व॒क्षि । य॒क्षि । च ॥ सः । नः । पा॒व॒क । दी॒दिवः॑ । अ॒ग्ने ।  
 दे॒वान् । इ॒ह । ए॒ति । व॒ह ॥ उपे॒ति । य॒ज्ञम् । ह॒विः । च । नः ॥  
 अ॒ग्निः । शु॒चि॒व्रत॑त॒म इति शु॒चि॒व्रत॑ – त॒मः । शु॒चिः । वि॒प्रः ।  
 शु॒चिः ( ) । क॒विः ॥ शु॒चिः । रो॒च॒ते । आ॒हु॒त इत्या – हु॒तः ॥  
 उ॒दिति॑ । अ॒ग्ने । शु॒चयः॑ । तव॑ । शु॒क्राः । भ्रा॒जन्तः॑ । ई॒र॒ते ॥

तव । ज्योतीर्षि । अर्चयः ॥ 31 (64)

(पुरु॒निष्ठः – पु॒र्वणी॑क – भ॒रा – ऽभि – व॒योभि॑र् – य –

आयू॑र्षि – वि॒प्रः शु॒चि – श्व॒तु॒र्दश॑ च) (A14)

=====

Prasna Korvai with starting Padams of 1 to 14 Anuvaakams :-

(दे॒वस्य॑-र॒क्षो॒ह॒णो॑ -वि॒भू-स्त्व॑ सो॒मा- ऽत्य॑न्या॒नगां॑ - पृ॒थि॒व्या -  
इ॒षे त्वा - ऽऽद॑दे॒ वाक्ते॑-सन्ते॑- स॒मु॒द्र- ह॒विष्म॑तीर्- हृ॒दे-  
त्व॑म॒ग्नेरु॒द्र-श्च॑तु॒र्दश॑ । )

Korvai with starting Padams of 1, 11, 21 Series of Panchaatis :-

(दे॒वस्य॑-ग॒म॒द्ध्ये॑-ह॒विष्म॑तीः-प॒व॒स-ए॒क॒त्रि॑ंशत् । )

First and Last Padam of Third Prasnam:-

(दे॒व॒स्या-र्च॑यः)

॥ हरिः ओं ॥

॥ कृष्ण यजुर्वेदीय तैत्तिरीय संहिता पद पाठे  
प्रथमकाण्डे तृतीयः प्रश्नः समाप्तः ॥

---

### Summary breakup of Padam - in Kaandam 1, Prasnam 3

Particulars		Example ( in Pada PaaTam)	No. of Padams as per Pada PaaTam
सामान्य पदानि	Ord	इषे । त्वा । ऊर्जे ।	1221
उपसर्ग पदानि	PRE	एति = (आ+इति) । उपेति = (उप+इति) । प्रेति = (प्र+इति) ।	99
वेष्टन पदानि	PS	उपायवः = उपायव इत्युप - आयवः । बाहुभ्याम् = बाहुभ्यामिति बाहु - भ्याम्) ।	229
प्रग्रह पदानि	PG	ते = (ते इति) । त्वे = (त्वे इति) । चक्षुषी = (चक्षुषी इति) । विष्णो = विष्णो इति ।	14
प्रग्रह वेष्टन पदानि	PGS	अधिषवणे = अधिषवणे इत्यधि - सवने । इन्द्राग्री = इन्द्राग्री इतीन्द्र - अग्री	4
Total Padams			1567

### Details of Panchati and Padam for Kandam 1 – Prasanam 3 – TS 1.3

	Panchati	Padams
Anuvakam 1	2	118
Anuvakam 2	2	102
Anuvakam 3	1	58
Anuvakam 4	3	131
Anuvakam 5	1	60
Anuvakam 6	2	119
Anuvakam 7	2	81
Anuvakam 8	2	94
Anuvakam 9	2	105
Anuvakam 10	2	78
Anuvakam 11	1	76
Anuvakam 12	1	34
Anuvakam 13	2	97
Anuvakam 14	8	414
Total →	31	1567